

拏即對 **New York** 參加黃聲宏醫師，就是聰美姊記念基金會主席，的葬式轉來以後，心情非常沈重，怨嘆這世間好人 **hiah-nī** 緊就 **beh** 回歸天家，怨嘆生命的無常。雖然知影上帝用伊的自由及伊的意志 **teh** 統管這世間，但是這我只有怨嘆。

黃醫師平常無愛講話，講話嘛真細聲，雖然因老爸黃理鰲醫師給伊號做「聲宏」。自從二十幾年來識伊以後伊就是一位良師益友，時時指導、鼓勵、安慰我。二十幾年前我為因老爸做無教會主義形式的葬式以後，無想到今仔日佇同這間「衛鄉台灣教會」，咱做伙抑欲送伊轉去，心內非常毋甘。

黃醫師的大姊叫做黃聰美醫師，嫁互日本醫師伊籐邦幸，二人結婚以後 **sio-chhoā** 去尼泊爾(**NEPAL**)的山內為散赤人做日本基督教團海外醫療傳道的事工，做二十外冬，生六個囝。轉來日本以後，聰美姊每個月為台灣獨立聯盟發行的「台灣青年」奉獻三萬圓日票將近二十冬，攏無出伊的名。為著記念這種無私奉獻的偉大的台灣女性的精神，阮設立「聰美姊記念基金會」，用眾人奉獻的錢來發行「台文通訊」，目前咱的網站([www.chhongbi.org](http://www.chhongbi.org))欲將過去 500 幾本唯一存佇世間的「台灣青年」雜誌灌入去網站，欲將 **chia-ê** 豐富的台灣人的精神資產，留落去、流傳落去，**hō-lán** 經過 **chiah-ê** 資料，得著新的啟發，奮起台灣人獨立運動的意志及行動。黃醫師一直是基金會的主席。

起頭主耶穌 **teh** 招學生的時（約翰福音 1:43-51），看著拿但業 **khiā** 佇樹仔腳 **teh hia** 偷看伊，耶穌叫伊出來。伊問耶穌你按怎 **teh** 叫我？耶穌講：「你 **khiā** 佇無花果樹腳的時，我 **toh** 已經看著你啦！」「看啊！這個人就是真正的以色列人！因為伊的心內無詭詐。」耶穌講的「以色列人」毋是講通常的猶太人，猶太人對雅各開始就含有詭詐的成分。耶穌講的「以色列人」是講「**Ish-roeh-el**」，就是講「目睷看著上帝的人」的意思。所有目睷會當看著上帝的人，攏可以叫做「以色列人」。黃聲宏醫師就是一位真正的以色列。黃醫師靜靜 **khiā** 佇無花果這樣生命樹的下面看耶穌，就互主耶穌認著伊是一位心靈謙卑、清氣、安靜的上帝的囝。黃醫師真正是一位心靈的目睷會當看著上帝的人。不但按呢，耶穌講伊的目睷會看著天開，看著天使佇天梯上起起落落。

咱的目睷豈有法度看著天門開開，看著天使佇天頂地面起起落落？我想有可能，我想咱毋免等到肉體離開這世間，就有法度看著上帝的天梯及靈魂世界的天使。人的構造分三部份：頂面的靈，是創世以來直接及上帝牽做伙的部

份，就是咱台灣人所講的頭殼三尺有神明全款意思；第二部份叫做魂，伊包括思想、感情及意志；第三部份就是咱看會著、摸會著的肉體。人拄著死的攻擊以後，伊的靈直接轉去上帝 **hia**，伊的肉體回歸地面的大自然，但是伊的魂並無 **hiah-nī** 簡單就結束。

咱人的思想、感情及意志是人存在第一明顯的所在。伊一世人的心願、愛情、記憶、思想、抱負攏親像一台咱厝內的電腦，咱這台電腦是上帝電腦總部的末端機，咱一生所講過的話、所想過的代誌、所做過的行為，所有幼年的經驗，所有孩童時代看過的草花及草莖，所有的歡喜及目屎，所有的悲哀及熱情及希望，一點一滴，甚至咱家己已經袂記佇的代誌，嘛攏存佇這台末端機內面。上帝的電腦總機就是親像美國國家的電腦總部，是國家整個的頭腦。國家電腦總部若是故障，咱佇銀行 **chhun** 佻濟存款，「**phah!**」一聲攏會消失，國家的重要資訊、軍事機密，「**phah!**」一聲，攏會失蹤。但是咱一生的記錄佇上帝的電腦內，永遠袂失蹤，上帝會給咱記到 **tiâu-tiâu-tiâu**、記到清清楚楚。**Chiah-ê** 資料就是咱靈魂的 **DNA**，**khng** 佇上帝「魂」的寶庫內面。**Chiah-ê DNA** 會經過咱肉體的後代傳落去，嘛會經過魂的作用，繼續影響咱地面的社會，繼續佇環境世界中存在，繼續擴散，繼續「執著」佇世間。

黃醫師猶未完成的意志及心願，上重要的部份就是「台灣獨立」。「台灣獨立」是黃醫師真重要的魂的組成因素的一部分。以前這個部份佇伊的頭殼內面時時有掛慮、有衝擊、有鬥爭，**chim-má** 毋免啦，這部分的魂已經得著解放啦，毋免經過人的肉體的頭腦的束縛啦，已經飛到天頂啦，已經得著自由啦。伊這部分的「魂」，因為無閣受著肉體的阻擋，顛倒變做 **koh-khah** 完美，**koh-khah** 直接，**koh-khah** 活動，**koh-khah** 有影響力，有完全的自由。肉體的頭腦將伊的台獨思想反映出來的，不過親像一個「鏡」，不過一個「形而上」的受動的「觀念」**nia-tia<sup>n</sup>**。但是這個思想，進入「魂」的世界以後，會變做一個實存的存在。混沌的思想、抽象的觀念，會變做清楚、實在的體，存在佇上帝的世界內面。人的肉體雖然變老，雖然破病變歹款，但是進入死亡的門以後，伊的靈魂會變真 **súi**。死是互靈魂變做美麗的過程，死是靈魂淨化的過程。每人去到彼個世界，攏會變做真 **súi** 的人格，變做真完全、真成熟、真理想的人格的存在。彼種美麗毋是肉體狀態有法度表現的美麗，世間一切的矛盾對立，佇彼所在攏得著統一；但是伊的人格的思想、感情、意志的特質，佇彼所在猶無改變，不過是受純化。

佇上帝的世界內面的「台獨」思想，不但是伊的思想、感情、意志的「魂」的綜合的實存，**koh-khah** 是一種非常淨化非常美麗的魂的目標及動力。這

個實存的魂是超越陳腐的語言，不受肉體及物質的拘束，超越現實世界的禮儀、衝突及鬥爭，超越朋友及敵人的分野。這種意識的魂已經昇高到最高的位階，是能動的、絕對自由的、絕對歸依佇上帝的世界的存在。伊已經毋是觀念的幻影，毋是空想。伊是純全的靈魂的一部分。伊毋免閣喉叫，毋免大聲，毋免怨嘆，毋免閣為著「台灣青年」的入網煩惱，毋免閣為著台灣母語的流失心槽，毋免閣再及國民黨的法統、正統、教條 **ko-ko-tî<sup>n</sup>**。因為伊的靈魂活佇完全純情的世界，活在太陽的光輝的內面。這是我對伊的過身得著的啟發。